

Kalaallit Nunaanni inuiaqatigiit ilusilersugaanerata misissoqqissaarnissaanut suleqatigiissitaliamik pilersitsisoqarnissaa pillugu Inatsisartut aaliangiiffigisassaanut siunnersuut, taamaalilluni ataqatigiissumik politikkikkut ilusilersuinermut iliuusissamik pilersaarusiornissamik pilersitsisoqarnerussammat, imminut napatittumik aningaasaqarneq aqutigalugu politikkikkut namminersulersinnaanissaq anguniarlugu.
(Inatsisartunut ilaasortaq Niels Thomsen, Demokraatit)

Akissuteqaat

(Aningaasaqarnermut Naalakkersuisoq, Palle Christiansen)

Siullermeerneqarnera

Inatsisartuni ilaasortaq Niels Thomsen kissaateqarpoq inuiaqatigiit aqqissugaanerata pillugu ataqatigiissumik iliuusissatut pilersaarusiortoqassasoq, imminut napatittumik aningaasaqarneq aqutigalugu politikkikkut na minersulersinnaanissaq anguniarlugu.

Naalakkersuisut siunnersuuteqartoq isumaqatigaat oqarmat inuiaqatigiit sinaakkutassinneqartariaqarnerat pingaaruteqartoq inuiaqatigiit aqqissugaanerisa allanngortiternerisigut ataatsimoorussamik siunnerfeqarsinnaaqqulluta.

Siunnersuuteqartup siunnersuutaanut assingusumik suliamik Naalakkersuisut aallartitsererput tassalu nunap immikkoortukkaartumik ineriartortitsinissamut iliuusissanik suliaqartitsinermik, tassani siunnersuuteqartup siunnersuummini takorluugai eqqarsaatailu ilaatigut suliarineqassallutik. Nunap immikkoortukkaartumik ineriartortitsinissamut iliuusissanik suliami ilaatigut imarineqarlutillu suliarineqassapput inuiaqatigiit massakut aqqissugaanerata, taannalu nunap immikkoortuini ataasiakkaani ineriartortitsinissami unammillernartuusussaavoq.

Naalakkersuisut nunatsinni isorartoqisumi nunap immikkoortukkaartumik ineriartortitsinissamut iliuusissanik suliaqartitsinissamik kissaateqarnerannut pissutaavoq, najugaqarfiit ataasiakkaat avinngarusimanerat pissutigalugu nunap immikkoortui ataasiakkaat, illoqarfiit nunaqarfillu ataasiakkaat tamarmik immikkut atugassaqartitsisarmata tamarmik asseqanngitsunik periarfissallinnik. Taamaattumik Naalakkersuisut nunap immikkoortukkaartumik ineriartortitsinissamut iliuusissanik suliaqartitsinermikkut anguniarpaat, nunap immikkoortuini ataasiakkaanni ineriartortitsinikkut periarfissat assigiinngitsut nukittorsarnissaat.

Naalakkersuisut siunniussimavaat nunarput nunap immikkoortuinut arfinilinnut agguarneqassasoq, ilaatigut kommunerujussuit nutaat agguarneqarsimanerat aallaavigalugu, tassalu nunap immikkoortua 1.: Illoqarfiit nunaqarfillu Uummannamiit avannamut.

nunap immikkoortua 2.: Illoqarfiit nunaqarfiillu Qeqertarsuup Tunuaniittut.
nunap immikkoortua 3.: Sisimiut aamma Maniitsoq taakkunanilu nunaqarfiit.
nunap immikkoortua 4.: Tunu.
nunap immikkoortua 5.: Nuuk, Paamiut aamma Ivittuut taakkunanilu nunaqarfiit.
nunap immikkoortua 6.: Kujataa.

Nunap immikkoortuisa taamatut agguarneqarnerini aallaavigineqarput nunap immikkoortuini ataasiakkaanni illoqarfiit nunaqarfiillu assigiissutaat imminnullu ataqatigiinnerat. Taamatut agguartaarinermi pitsaaqutit ilagaat nunap immikkoortuini ataasiakkaanni nukittoqutit unammilligassallu annertunerusumik isiginiarneqarsinnaanissaat. Nunap immikkoortuini ataasiakkaanni makku pingaarnerutillugit misissorneqassapput: Atugarissaarnej, Inuussutissarsiuutigut ineriartortitsineq, piginnaasanik ineriartortitsineq, attaveqaatit aningaasalersuisinnaanerlu.

Naalackersuisut naatsorsuutigaat nunap immikkoortukkaartumik ineriartortitsinissamut iliuussisanik suliaqartitsinissaq 2010-p aallartinnerani aallartinneqarsinnaassasoq 2010-llu naanerani naammassineqarsinnaassasoq.

Inatsisartunut ilaasortap Niels Thomsenip eqqarsaatersuutai eqqarsaatailu aalajangiiffigisassatut siunnersuuteqarnermini saqqummiussai Naalackersuisunit nunap immikkoortukkaartumik ineriartortitsinissamut iliuussisanik suliaqartitsinikkut sulissutigineqalereermata, matumuuna inassutigissavara aalajangiiffigisassatut siunnersuut itigartitsissutigineqassasoq.